

Relato di 55 aña di existencia di grupo Cultural Hubenii "De Trupialen"



ORANJESTAD (AAN): Na aña 1953 Aruba tabata un isla simpel y keto. No tabatin television y mucha homber- y mucha muhernan tabata bay schoolnan separa. Baymento di misa, cine, wak weganan di futbol tabata e actividadnan mas importante di siman, fuera cu na cas e muchanan mes tabata organiza diferente weganan, manera polis cu ladron, caco di tik, balla trom, wegá di kiniki, pele, caco'scondi etc....

Den e tempo ey talento musical, e curiosidad cultural, e amor pa mucha y e curashi pa haci cosnan nobo, a pone un homber, un educador hulandes, lanta un grupo di canto di mucha homber so, cu a haya e nomber di "De Trupialen". E homber aki tabata Rien Preyde, pa nos "Frere Alexius".

Pa ser exacto "De Trupialen" a ser funda dia 13 di Januari 1953, pues e grupo aki ta existi 55 aña.

Entre su amigonan cu a curashi for di un principio, tin Frere Caspar (QEPD), Frere Paulino, Frere Antonius y otro frerenan. Tambe tin Padu Lampe, Hubert Booi y Rufo Wever (QEPD).

Despues cu Frere Alexius a experimenta un poco tempo, poco poco e grupo a bin descubri nan mes un direccion, esta un grupo cultural, cual a dedica nan mes na preserva y na mes un tempo, promové y divulga e cultura Arubano.

Riba tereno di canto, esaki tabata nifica, busca of miho bisa saca tur loke tabata casi lubida caba, pone ariba tera, esta canticanan popular Antiyano-Arubano.

E prome idea tabata pa e grupo canta misa huntu cu e koor di Frerenan, pero e acogida tabata asina grandi cu poco tempo despues a cuminsa pidi e grupo pa canta na otro ceremonianan official. E interes pa "De Trupialen" canta tabata asina grandi cu mester y a dicidi pa amplia nan repertorio. E prome canticanan cu nan a cuminsa canta tabata saca for di e buki "Land en volkenkunde van Curacao".

Pero e canticanan aki tabata asina poco, cu no tabata mucho coi gaba. E coleccion di canticanan for di e buki "Ban canta", tambe a yuda basta cu algun cantica, pero no suficiente cu nan por a topa cu canticanan cu algo tipico di nos pueblo.

Puntra aki puntra aya, ariba un bon dia Frere Alexius a yega te na porta di hospital San Pedro, no pa malesa, no. Akina el a encontra cu Srta. Pascuala Maduro, kende tabata dispone di un coleccion basta regular di net e canticanan cu Frere tabata busca, canticanan gracioso, bunita y yen di pep.

Pascuala a skirbinan, tin biaha canta nan y grabanan riba tape-recorder.

Lennie Coronel, otro musico conoci tambe a yuda Frere masha hopi cu skirbimento di nota pa e canticanan.

"De Trupialen" a dicidi di haci

otro actividadnan. A cuminsa sifa e muchanan toca instrumentonan musical y tambe hunga comedia. Poco tempo despues e coro tabtin su propio banda musical "Los Elegantes". Tambe a sifa e muchanan obranan di teatro, Poppenkast, cu te awe ta activo y cu a bira masha famoso tanto pa mucha cu hende grandi.

E canto di grupo a hala masha atencion...pero tambe masha discucion, pasobra Frere a tribi, den e añanan cincuenta pa canta canticanan na Papiamentu den e tempo cu Hulandes tabata e idioma cu tabata domina. E prome biaha cu Frere a canta canticanan na Papiamentu den publico tabata na ocasion di Aña di La Reina. Frere a hanya masha hopi critica mes...pero el a hanya tambe masha hopi elogio!!!!!!

Frere su conviccion, un pueblo mester papia y canta den su propio idioma pa e por desaroya su mes, a pone sigui canta na Papiamentu cu su grupo. E prome disco cu "De Trupialen" a graba tabata un composicion di Rufo Wever y Padu Lampe, un wals "Aruba dushi tera", e cancion cu awe despues cu nan a modifika, a bira nos Himno Nacional.

De Trupialen tabata consisti di mucha hombernan so. Ta despues, na fin di añanan cincuenta tambe tabata tin mucha muhernan, pero e pensamiento di un grupo mixto den e temponan aya a haci cu Obispo a dicidi cu esey no tabata por y e coro a bolbe bira uno di mucha homber so. Ta den añanan sesenta a bolbe permiti mucha muhernan drenta den e grupo atrobe y te awe esey ta e caso. Nos por bisa cu awor tin mas muchamuhér cu muchahomber cu kier bira miembro. Tambe nos por menciona cu diferente parehanan cu a contrae enlace matrimonial a Sali for di den e neishi di De Trupialen.

Den e 55 aña cu De Trupialen ta existi, hopi curason, den tur skian na Aruba, nan a haci contento cu nan canto, comedia, musica y tambe Poppenkast. Pasando den tur barrio aki na Aruba, de Trupialen tabata trece alegria, hopi biaha riba terenonan di school of bao di overdekte speelplaats. Entre e comediantan famoso nos tin "Scapin", "Buchi", "Tenten Berom". Tambe comediantan musical manera "Hans en Grietje", "E Corona di Shon Rey", "Triunfo di un Piscador", y e famoso "Perla di Caribe", cu no solamente na Aruba a cosecha exito grandi pero tambe na Curaçao y Bonaire.

For di e "Perla di Caribe", un obra skirbi pa Hubert Booi a Sali e famoso "Ora Ubao".

Nos mester menciona nomber di algun persona cu tambe a duna nan aporte, manera Sr. Toti Arends, cu pa basta aña tabata advisor di De Trupialen. Sr. y Señora Hasselaar di Arubaanse Muziekschool di e tempo ey, cu tambe a haci tur nan

posibel pa colecta texto y melodianan Arubano.

E tenor Arubiano Rufo Odor, e gran piensita Alwin Toppenberg cu tambe a duna nan parti.

E prome banda musical di De Trupialen cu a cosecha masha hopi exito y fama, no solamente na Aruba, pero tambe den exterior, tabata e grupo "Los Elegantes". E tabata e prome grupo di "Rock&Roll" moderno estilo latino cu Aruba a conoce. Te awe e ta worde reconoci como e origen di bandanan moderno aki na Aruba. Despues a sigui varios otronan den transcurso di añanan manera "Purple Magic", "The Truplets"...Hopi ta musiconan na Aruba cu por conta di nan propio experiencianan musical den "De Trupialen".

Existonan di otro actividadnan cultural manera "Teatro Harlequino" (grupo di poppenkast), ta bon conoci.

Mester bisa cu nunca e lideman di De Trupialen a purba di para e actividadnan progresivo di nos huentud, al contrario nan tabata bay cu tempo y moda, pero nos propio himno, cultura, y normanan y balornan nunca a ser lubida.

Tambe nos mester menciona cu gruponan di Gaita, Symfonia di boca a haci nan entrada den club. Pa duna e gruponan mas responsabilidad Frere tabata kier pa nan mes forma nan mes un direktiva, principalmente e huentud mas bieu tambe tabata kier tin algo di bisa. Na final di añanan sesenta e songfestivalnan a cuminsa bin hopi na moda y De Trupialen no a keda atras. Tur e gruponan tabata organiza nan mes un Festival di canto, naturalmente cu ayudo di Frere Alexius, cu nunca a laga niun grupo na caya. Carnaval tambe tabata worde celebra den grandi, cu hopi entusiasmo den club. E actividadnan di De Trupialen tabata hopi y nan a bin ta ocupa un lugar indispensable den e comunidad Arubiano.

Pa e muchanan cu a lanta den club di De Trupialen e no tabata solamente un coro of banda musical, e tabata un centro di recreacion, un lugar pa topa cu bo amigonan, un lugar pa sifa cosnan cu bo no por a sifa otro caminda. Hopi a sifa dirigi reunionan, sifa tuma decisionan na un manera ordena y responsabel, sifa kico ta puntualidad y disciplina, algo cu a bay perdi den nos comunidad, loke ta di lamenta. Hopi a sifa hiba discursu den publico y a sifa organiza actividadnan. Un cantidad grandi di hendenan den nos comunidad awe a haya e oportunidad di desaroya nan talentonan diverso den nos club. Pero mas cu tur "De Trupialen" ta pa tur cu a forma parti di dje, un lugar cu tabatin alegria. Un lugar caminda a nace amistadnan pa resto di nan bida. Ki ora cu algun "Trupial" bieu topa cu otro nan ta

conta otro sin fin, di e suseonan cu nan a pasa aden cu ta pone hasta esnan cu no a pasa aden hari te yora. Esey tabata y ta sigui ta "De Trupialen". Un fuente di alegria, talento y crecemento di nos yunan pa un bon futuro.

For di 1985 te cu 1991, mientras actividad musical den club a para temporalmente, Sr. Bill Tromp a dicidi di cuminsa cu un grupo di poppenkast y tambe di comedia. Huntu cu su grupo di poppenkast Bill a sa di tene e actividadnan na club bibo.

Na 1991 a habri e posibilidad pa genera miembro nobo y pa ser exacto 27 di September, Lem Pieters como director musical y Mario Tromp como su asistente, a cuminsa atrobe cu lesnan di canto y asina a reactiva e grupo musical. Nos famoso koor a lanta atrobe. E prome presentacion tabata 22 di November, dia di Santa Cecilia, na Misa di Playa cu un solo cantica, e himno di Santa Cecilia.

E salida official a tuma lugar dia 25 di December 1991 den Misa San Francisco pa 8'or di mainta. Aki e coro a canta su prome misa cu acompañamento musical di e banda forma pa Trupialnan grandi caba.

Awe e dos lideman, Lem y Mario, ainda ta activo y ta ensayando cu e muchanan.

Un di e actividadnan importante cu a tuma lugar ta e boutismo di e prome CD di De Trupialen cu ta hiba e nomber di "Ora Ubao" y a worde batista cu awa di coco. E actividad aki a tuma lugar diasabra di 17 di Januari 1998. E CD aki tin dos padrino, esta Sr. Padu Lampe y Sr. Hubert Booi.

Otro actividadnan tabata e.o. Canta Misa activamente durante tur e añanan cu a pasa

— Produccion di 2CD- un cu cancion popular titular "Ora Ubao" y otro cu cancion di Pasco titular "E Bon nobo".

— Produccion di un single CD titular "Ban canta Gloria hubila"

— Presentacion na diferente hotel, television, KIA, Paviljoen durante e temporada di Pasco.

— Presentacion na diferente concierto di Pasco di nacemento y Pasco grandi organiza pa e maestro Rufo Odor.

— Grabacion di jinglenan pa television.

— Delavacion di e borchí di caya cu ta carga e nomber di e tata di "De Trupialen", Frere Alexius

— Varios presentacion na entrega di e Copa Rotativo Felipe Tromp, na ocasion di celebracion di aña di La Reina.

— Show di fin di aña na Cas di

Cultura

— Celebracion di 40 aña cu un tremendo show den Cas di Cultura

— Presentacion riba dia di Betico y 18 di Maart na Plaza libertador Betico Croes y participacion na desfile

— Na 1995 De Trupialen a ricibi e premio "Mo Tito Y Rufo Wever" loke pa nos ta un orguyo masha grandi.

— Na maart 1996 De Trupialen a presenta un show den Fort Zoutman en conecion cu nan celebracion di 43 aniversario y celebracion di 18 di Maart.

— Na 1998 De Trupialen ta ricibi un plakaat di merito door di Tele Aruba

— Tambe a y ta tumando luga den club lesnan di baile bao direccion di Nico Luydens.

— Tambe a keda presenta diferente comedia bao direccion di e.o. Jossy Tromp y Señora Sonia Herde.

— Trupialen a organiza pa su miembronan diferente evento social manera wandelsterrit, caminata den naturalesa, cena di pasco, actividad di Carnaval y hopi mas.

— Pa e miembronan y mayornan y famia ta organiza tur aña un Christmas dinner Show na un di e hotelnan, cu canto baile y musica di e mes miembronan.

— Na December 2004 nos a presenta nos CD di Pasco "Cerca e niño Dios".

— Tambe na aña 2004 nos a worde honra cu e merito como "Coro Hubenil di Aña 2004" pa Canal 90.

— Tambe Festival di canto 18 di Maart a worde dedica na De Trupialen en conecion cu nos 50 aniversario.

— Na aña 2005 nos a presenta un CD dedica na 18 di Maart "Nos Baranca" acompaña pa un tremendo video clip.

— Na aña 2007 nos a presenta un CD/DVD "Mi Tesoro"

Esaki ta un resumen cortico di lo cual a mantene De Trupialen activo durante e ultimo añanan. Pa 2008 nos tin diferente proyecto na bista.

Proyectonan ta hopi, grandi of chikito. Nos meta principal ta pa guia nos muchanan den tempo liber pa ta activo haciendo algo cu nan ta gusta, sea ta canta, balla of simplemente formando parti di un grupo Cultural asina renombra manera De Trupialen.

Sigui lesa pag. 33